



UKA16/28
27. september 2016
Muté B. Egede

Uunga siunnersuut: Sermip ergullu avammut nioqqutissatut ator neqarnissaat pillugu Inatsisartut inatsisaata allanngortinneqarneranik Inatsisartut inatsisaat nr.xx, yy 2016-imeersoq (Inuussutissarsiornermut, Suliffeqarnermut, Niuernermet Nunanullu Allanut Naalakkersuisoq)

Inuit Ataqatigiit nunatta pissarititaanik atorluannitsigut nutaamillu eqqarsarnitsigut nunatsinni aningaasarsiornermi ineriartornissarput pingaarluinnartutut isigaat.

Nunatsinni imeq sermerlu nungussaangiusattumik pigaagut ukiorpassuanngortunilu aningaasarsiorniffissatsialattut isigisarsimallutigit. Nunarsuatsinni imermik pisariaqartitsineq qaffakkiartuinnarpoq, taamaattuarallassasorlu siulittuutigineqartarluni. Nunarsuarmi ineriartorneq taamak ikkaluartoq ajoraluartumik nunatsinni imermik sermimillu tunisassiorneq iluatsilluarsimasutut taasinnaangilagut. Piffissanngorporlu tamassuma illuatungaanut saatsinnissaa.

Ingerlariaqqittariaqalerpugut, nunatta tunniussinnaasai ataatsimoorfigalugit inuussutissarsiutinillu pioreersunik kalluaanngikkaluarluta inerisaanissamut aqutissiuussinissarput piffissanngorpoq. Tassa, periarfissagut tamakkiinerusumik atortariaqalerpagut maannamiillu siammasinnerusumik eqqarsarluta inuiaqatigiittut ataatsimoorluta immitsinnut, inuussutissarsiutitigit aningaasarsiornitsigullu kivittariaqalerpugut.

Aporfiit ineriartornissatsinnut killilersuisut suleriutsillu eqartumik ingerlanneqartut nunami maani innuttaasunut inuussutissarsiortortatsinnullu atugassarititagut maannakkut iliuuseqarfisariaqalerpagut. Namminiilivinnissarpummi siunnerfigaarput angutserneranilu uatsinnut aporfiusut isigisagut aporfijunnaarsillugit aqutissiuuseqatigiittariaqarpugut.

Inuit Ataqatigiit iluarisimaarlugu oqaatigissavarput Naalakkersuisut uani siunnersuumminni ineriartortitsinissamut aporfiit ilaannik aaqqiissutissamik siunnersuuteqarmata. Alloriarneq annertoorsuartut taaneqarsinnaagunangikkaluarpoq. Pitsaasumulli alloriarnigut annikkaluilluunniit aallartiffisariaqarpagut, alloriarsimannginnermiimmi pitsaanerummat.

Inuit Ataqatigiit erngup sermillu tunisassiarilluarneqalernissaanik neriuteqarluarpugut aqutissiuuseqataajumaarlutalu. Nunatsinnimmi aningaasarsiornitsigut suliffissaqartitsiniarnitsigullu siuariartorniarutta nunatta pissarititai atorluarnerusariaqarpagut niuerutigalugillu. Taamaaliorniaruttalu imermik sermimillu tunisassiorneq maannamiit pitsaanerusoq avaqqussinnaangilarput.

Inuit Ataqatigiit taamak oqaaseqarluta Naalakkersuisut siunnersuutaat ilalerparput aappassaaneerneqartiganili inuussutissaqarnermut ataatsimiitsitaliami suliarineqaqqaarnissaa inassutigalutigu.